


# Alegria y Fantasia

## Di 10 candidata ta Jennifer Guzman pa Knock Out & Pop Corn Dancers



Durante dia di Dialuna último un di 9 y 10 candidata a inscribí pa e eleccion di Reina di Carnaval di Aruba 2000.

E promé ya caba Alegria & Fantasia a duna di conocé y e último ta Jennifer Guzman, kende lo representá Knock Out Model Agency y tambe Pop Corn Dancers. E tin 19 aña.

## CARNAVAL 2000 - BACANAL 46

### Actividadnan di Carnaval

Diaranzon 1 di Maart - 8:00 pm - Patras di Watertoren San Nicolas - HEPA San Nicolas

Diahuebs 2 di Maart - 8:00 pm - Don Elias Mansur Ballpark - Eleccion di e di 46 Reina di Carnaval Aruba

Diabierna 3 di Maart - 11:00 am - Postkantoor Oranjestad - Jump In di EPI Sector Salubridad y Servicio

Diabierna 3 di Maart - 5:00 pm - Jump In di ATA, ING Fatum, AHATA, Arulex y Ministerio di Turismo.

Diabierna 3 di Maart - 5:30 pm - Santa Cruz - Parada di Colegio Laura Wernet Paskel

Diabierna 3 di Maart - 8:00 pm - TeleAruba - Festival di Utilidad (Elmar, Setar, WEB y TeleAruba)

Diasabra 4 di Maart - 4:00 am - San Nicolas - Jouvert Morning

Diasabra 4 di Maart - 2:00 pm - San Nicolas - Parada Grandi San Nicolas

Diadomingo 5 di Maart - 11:00 am - Oranjestad - Gran Parada di Carnaval Aruba

Dialuna 6 di Maart - 4:00 pm - Oranjestad - Parada di Cabai

Dialuna 6 di Maart - 7:00 pm - San Nicolas - Kimamento di Momito

Diamars 7 di Maart - 8:00 pm - Oranjestad - Kimamento di Momo

## Comentario di Carnavalista Corrupcion den Reina Infantil

Señor redactor, permitimi un espacio den bo corant mas lesá.

Na promé lugar mi kier conta pueblo mi disgusto den eleccion di "Reina Infantil" pasó mi sa cu tur hende ta bezig cuestionando e "Tumba Contest" pero hopi hende a lubidá riba nos chikitinan cu tambe a wordo afectá dor di nos grandinan. Lagami expresá loke un Mama ta sinti ora nan hunga cu su jiu, pasobra mi kier cuminzá na conta kico a wordo palabrá den reunion di reina Infantil.

Señora Tecla a cuminzá cu e reunion bisando tur e reglanan cu tin pa e anochi di eleccion (copia na redaccion) pero esey no ta tur, pa nos sorpresa el a bisa cu maximo pa 15 persona riba stage siendo cu tabatin mas cu 100 persona cu pas pa otro candidatanan, awor ta bin mi preguntanan y mi ta spera cu comision di SAC por contestá nos:

1. Si pa cierto candidata tin regla y pa otro no?

2. Segun Tecla, máximo 15 persona riba stage. Dicon otro candidatanan si por a presentá cu mas di 15 persona riba stage?

3. Cada candidata segun regla lo haya strapunten, paso den pasado tabatin hopi cu ta pas alimite, pero pa sorpresa promé cu eleccion e MC ta anunciá cu no ta bai tin strapunten. Dicon?

4. E timeclock tabata pronkstuk pasobra tabatin candidata cu a pasa nan minuutnan, pero no tabatin strapunten pa nan. Dicon?

5. Speech tabata máximo 2 minuut y casi mayoría di tur e candidatanan a pasa di nan minuut.

6. A base di kico e hurado ta huzga e candidatanan? Pasobra den reunion Tecla a bisa cu show no ta conta. Señor Rivero a reaccioná mesora bisando cu

ta dor di show nos eleccionnan ta cabando, mester stop cuenta di show.

Y e pregunta di mas grandi ta Dicon esun cu a cumpli cu tur e reglanan a cai afor?

Pero esaki no ta tur, pasobra e sorpresa di mas grandi cu nos a haya no pa gana di corona, pero simplemente pa nos mayornan sa kico tin tras di tur eventonan di SAC pasobra SAC ta scohe miembronan di hurado, pero SAC ta saca esun cu e kier pa sali na nan fabor. Señores, lesa bon kico mi ta bai skirbi pasobra awe ta cumi y mañan por ta di boso. Mi sorpresa ta cu mi a bai SAC pa wak score sheet di mi jiu y mi a haya un baño di awa friu ora mi wowonan a mira score sheet di mi jiu tur geknoei. Puntunan a wordo kitá for di mi jiu pa duna algun candidata chens pa sali, atrobe mi ta bolbe bisa cu no ta paga di e corona mi ta skirbi tur esaki, no ta pa e simpel hecho cu cosnan ta pasa y ta nan ta dicidí. Corda bon, nada no ta keda scondí, tur cos ta sali na claridad. Tin puntunan cu a wordo gestuff, no un biaha sino mas cu un biaha y ora mi a reclamá e secretaria di SAC a draai contestami: "Eigenlijk bo no tabatin derecho di wak esey, y a rancá e sheet for di mi man. Un cos mi kier bisa e

secretaria di SAC, cu awor bo por drecha e sheet bek si bo kier, pasobra awor mi sa pakico mi jiu no a clasificá den e finalistanan, pero for di un boca di hurado mi jiu tabata den e finalistanan, pasobra e mes a score punto halto pa mi jiu y e mes a haya sorpresa cu e mucha no a sali den e finalistanan y te awe e ta lamentá. Nan ta bisa cu politico ta corrupto, pero a resultá cu den SAC tambe tin corrupcion.

Mi ta spera cu mi remitido lo yuda boso mayornan pa pensa dos biaha ora boso manda boso jiunan pa eleccion di Reina pasobra eleccion di Reina ta gasto y si bo no tin placa bo no ta den e finalistanan.

Mi ta spera cu esun cu a kit apunto di mi jiu pordrumi anochi cu un consensi limpi, pasobra den tur manera ta un criatura e ta y e ta keda mi Reina. Mi ta orguyoso di mi jiu pasobra el a representá su barrio digamente. Nos sa cu nos no por bai cu tur e premionan, pero duna Cesar loke ta di Cesar y Dios loke ta di Dios.

Mi ta terminá na duna un palabra di aliento na Jaiskybell y Sharina pasobra e wegá lo ritipí.

*Danki, Dakota tur dia.  
Nomber y adres conocí  
pa redaccion.*

## Atencion participantenan di Hospi Jollies y The Groovy Babes

Hospi Jollies ta informá na tur su participante cu lo entregá disfraz riba Diahuebs 2 di Maart 2000 na edificio di PAAZ. E orario lo ta di 8'or bai dilanti. Si pa un motibo of otro, no por busca e disfraz, por favor tuma contacto cu miembronan di Hospi Jollies. Informacion cu Alegria & Fantasia ta ricibí for di lidernan di e grupo The Groovy Babes ta bisa cu ainda tin chens pa inscribí pa Parada Grandi di San Nicolas y Oranjestad. Esaki na cas di Mama Oncha na Adriaan Laclé Boulevard #6. Inscripcion ta limitá. Alabes ta informá cu awe lo ta último dia pa pasa busca banchi pa participacion pa Paradan Grandi. Corda cu sin banchi no por bai den e grupo.